

Ema barak iha devosaun oinoin ba santu oinoin: dala ruma ema rai imajen sira iha “Hananu ba Na’i”, dala ruma tara medalla...



maibé ita hatene ita-nia padroeiru sira ne’e?




Tansá hili sira nu’udar belun dalan nian?



Imi halo esperiênsia atu husu imi-nia parenti, ka aman inan matebian nia tulun? Imi reza oinsá no husu saida ?

(se bele fahe ho kolega sira)



Hateke ba kuadru ne’ebé tuir mai: saida mak reprezenta?



*Ha’u-nia
orasaun*

Nu’udar orasaun bele fahe se iha orasau ba santu ruma ne’ebé imi ida gosta, karik bele reza hamutuk, no mós bele hili Santu ida ne’ebé sei akompaña imi iha tempu ida ne’e no hakerek orasaun ida ba nia.

FORMASAUN ANIMADÓR SIRA ORATÓRIU NIAN (5)

HA’U FIAR SANTU SIRA TULUN MALU

Iha Fiar Apostoliku ne’ebé ita reza, depois de “Ha’u fiar Kreda Santa Katolika”, ita ko’alia kona-ba “Ha’u fiar santu sira tulun malu”, maibé loloos tenke dehan “Ha’u fiar komuñau ho santu sira”. Tan ne’e ohin ita sei hakle’an aspetu ida ne’e, e’ebé bainbain, ita ladún fó atensaun



Aspetu rua “ha’u fiar” nian, ne’ebé foin temi (Kreda Katolika no komuñau ho santu sira) liga malu maka’as, tanba sira hotu ne’ebé pertense ba Kreda mori; iha komuñau fiar no domin nian ho Kristu. Pasajen ruma S. Paulo nian bele tulun ita atu komprende komuñau ida ne’e katak sa:

1Kor 12, 12-27 (liuliu vv 26 no 27)

Rom 12,4-8

Ef 4,11-13.15-16

(bele fahe ba grupu 3 no grupu ida-idak koko atu aprezena signifikadu “komuñau” nian liuhusi buat ne’ebé nia lee)

Iha Orasaun Eukaristika III mós, selebrante reza nune’e:

halo atu ami ne’ebé habosu an ho Nia isin no raan, sai nakonu ho Nia Espíritu Santu, hodi sai isin ida, neon ida iha Kristu.

Pasajen sira ne'e, halo ita komprende katak sarani ida, bele dezenvolve nia an rasik no sai buat ne'ebé Maromak "mehi" se nia iha comunidade (Kreda) laran. Kreda mak comunidade iha ne'ebé membru sira hotu fó apoiu no reza ba malu, sai ida de'it iha Kristu hodi kria armonia entre ema sira, maski sira ema oinoin ne'ebé la hanesan ba idade, ba servisu, ba kondisaun...

Ita-nia grupu sira mós, hanesan "Kreda" ki'ik, ka bele dehan katak hanesan Kreda ne'ebé "hola isin" iha situasaun no kondisaun ida determinada. Maibé, bainhira Katekizmu ko'alia kona-ba komuñau santu sira nian, nia la hanoin de'it ba ita, ne'ebé oras ne'e sei la'o rai hodi la'o ba santidade no ba Aman Maromak nia Reinu, maibé hanoin mós ba sira ne'ebé liu ona mundu ida ne'e. Entre sira ne'e bele hanoin ba grupu rua tan: sira ne'ebé santu duni, katak sira moris ona iha

Maromak nia glória, iha Lalehan, no fahe Kristu Moris Hi'as nia kondisaun; maibé mós konsidera sira ne'ebé mate ona no sei hamoos an daudaun, tanba seidauk prontu atu tama iha Reinu Maromak nian.

Nune'e Kreda mak boot liu buat ne'ebé ema haree, tanba iha nia ita hetan sira ne'ebé sei moris daudaun no mós matebian sira; ita bele hetan ema sira ne'ebé ema barak harohan ba sira tanba iha sira-nia moris hatudu santidade, iha mós ema sira ne'ebé la sai "famozu", maibé moris tuir Maromak nia hakaran. Iha ita -nia padroeiru sira, no mós ita-nia parenti sira ne'ebé mate ona no ita fiar katak sira besik ona Maromak.

Iha komuñau ida ne'e iha buat ruma ne'ebé furak tebes, katak "tulun malu": ita ne'ebé sei moris bele husu sira ne'ebé mate ona nia tulun, maski sira ne'e la'ós santu "famozu" no, ho ita-nia orasaun, ita bele tulun sira se karik sira sei purifika an daudaun.

Ita-nia relasaun ho ema sira sei la para ho mate; ne'e katak se ita "liga malu" bainhira sei moris, mate la bele kore relasaun ida ne'e, maski oras ne'e, ita moris iha fatin la hanesan.



ISTÓRIA IDA



Bainhira dotor katuas mate, ninia oan na'in tolu mai atu fahe ninia sasán: iha kuadru sira, livru barak, fatuk murak husi rai seluk, armariu sira ho folin boot, maibé iha armariu ida nia laran sira hetan paun toos baluk ida ne'ebé karik iha tinan 20 liu ba. Sira hakfodak, maibé senhora ida ne'ebé servisu iha dotor nia uma haktuir:

Bainhira funu foin hotu no nasaun tomak iha hamlaha boot, dotor moras todan no ninia kolega dehan ba nia katak nia presiza hetan aihan di'ak, maibé oinsá bele hetan. Nia belun ida, foin rona buat ne'e, no nia lori ba dotor paun ida ne'ebé foin simu nu'udar presente. Dotor agradese liu ninia kolega, maibé bainhira haree paun ida ne'e, nia hanoin kedas ba ninia viziña nia oan, ne'ebé moras todan; dotor hanoin: "Ha'u katuas ona, maibé foin-sa'e ida ne'ebá presiza moris", nune'e haruka ba nia. Menina ida ne'e nia inan, bainhira simu paun, hanoin ba senhora refujiada ida ne'ebé hela besik no laiha ema atu tau matan ba nia. Ferik ida ne'e, simu tiha paun, hanoin kedas ba nia oan fetu no nia bei-oan na'in rua ne'ebé subar iha uma ida tanba ta'uk polisia. Bainhira haree paun fresku ida ne'e, oan fetu ne'e hanoin kedas ba dotor ne'ebé uluk kura ninia oan sira hodi la husu osan no oras ne'e nia rona katak moras. Bainhira dotor simu paun husi mana ida ne'e, nia rekoñese kedas, nia sente laran sadi'a no hanoin: "Paun ida ne'e habosu ema barak, maski sira la han. Ida ne'e paun santu ida!". dotor hakotu atu la han no nia rai iha fatin ida iha ne'ebé dotor bele haree nia hodi simu kbiit no esperansa.

Bainhira dotor nia oan sira rona istória ida ne'e, sira sente sira-nia aman besik liu, maski nia mate ona. Sira fahe paun toos ne'e entre sira nu'udar sira nia aman nia rekordasaun ne'ebé uluk fahe ba ema seluk tan domin.